

## Sepinien xa diamu te Pilipae

*?Visi iaxa tetis uvei ak?*

Pol, xa tehe eloheoh tei na Iesu Kristo tetis uvei ak<sup>☆</sup> e huram 61 AD (huram xil tetutou ni poten na Iesu), melele xa tete nim te xeih e taon xa mahulong te hal Rom.<sup>☆</sup>

*?Visi iaxa tevuli uvei ak tetiamu?*

Pol tetis uvei ak teha mi Kristin xil xa lateti e taon te hal Pilipae. Melele xa Pol di tekakao tangan vahithiten longeongen hos usil Iesu Kristo e kakaoen nan xa tehe valu nen,<sup>☆</sup> xi tepus moletin tei te provins te hal Masedonia texo metuveen tei.<sup>☆</sup> Moletin ak tekesi tangan vamei visal xil. Ma, Pol tehe Masedonia, e teha rohon e taon te hal Pilipae. E Pilipae, moletin holu mei lateling neketen nae e Iesu.<sup>☆</sup>

*?Pol tetis uvei ak veneh?*

**Pol ien tehei tangan vames Kristin xil te hal Pilipae ve sanien nae** - Melele xa Kristin xil te hal Pilipae latelongeong ni xa Pol tete he kavmen te hal Rom, latesa sanien nae xil teha tangan vatutou ni.<sup>☆</sup>

**Pol ien tehei tangan vapispisi mi Kristin xil te hal Pilipae ni sexien hos xil xa ipisen ni xa moletin be Kristin tei** - Pol tesel xat ngan xil te sias te hal Pilipae tehiti Kristin tei, nenemien nan

---

☆ :: Plp 1:1 ☆ :: Plp 1:7,12-14; Pol 28:30-31 ☆ :: Pol 15:3-18:22

☆ :: Pol 16:9-10 ☆ :: Pol 16:11-40 ☆ :: Plp 4:10-14

ihe tan ixoni ngan xa Iesu Kristo tepol ni,✧ iloh  
ixeih tangan ituxoh hoxalit lohen te neketen nan,✧  
nanexo ti ve neta tova,✧ e ikila ihisu ni melele te  
xeih xil itel xeihen xa Iesu Kristo isa ni mini.✧

**Pol ien tehei tangan vassel xat Kristin xil te  
hal Pilipae tangan ti lihur sien vehakut iti e  
meulien nae** - Melele xa Pol tetis sepinien ak  
teha mi Kristin xil te hal Pilipae, xil di latehur  
sakpurunien xil te xeih ve neketen nae.✧ Misak ni,  
Pol tesel xat xil tangan ti lipol ni holesok xil vus itel  
sien tang.✧

**Pol ien tehei tangan vassel xat Kristin xil te  
hal Pilipae tehit lipol vituei ihusil sexien hos**  
- Longpangasien xil✧ e pispisien te luvosen✧ di  
latesak ni Kristin xil te hal Pilipae di latengor mi  
xil mun tang. Ma, Pol tesel xat xil tehit ti lipol  
vituei ihusil sexien hos.✧

*Vatit nenemien tei te uvei ak de Pilipae 1:21*

Vengan xosxa nimeul, nipet rat Iesu Kristo ixo  
meulien navan. E xosxa nimat, ngan ak ihos  
mak mu, vengan xa ha nite visali.

*Vatit nenemien teimun te uvei ak de Pilipae 2:5*

Nenemien namim mei ixoni nenemien na  
Iesu Kristo xa tehe tan.

*?Naha iaxa di e uvei ak?*

1. Momal tangan ngan xil xa di langgusil Kristo  
ti lihisu ni melengien xil te xeih itel sien. (1:1-  
30)

---

✧ :: Plp 2:1-11 ✧ :: Plp 3:13-14 ✧ :: Plp 4:6 ✧ :: Plp 4:13

✧ :: Plp 1:27-30 ✧ :: Plp 1:4,25; 2:29; 4:4 ✧ :: Plp 1:29-30

✧ :: Plp 3:2-3 ✧ :: Plp 2:2; 4:2-3

2. Momal tangan ngan xil xa di langgusil Kristo ti lipol ni sexien hos xil itel sien. (2:1-30)
3. Momal tangan ngan xil xa di langgusil Kristo ti lisoh ixeh e neketen nae itel sien. (3:1-4:1)
4. Momal tangan ngan xil xa di langgusil Kristo ti litutou ni mosav xil itel sien. (4:2-23)

### *Sepkilaen na Pol usil uvei ak*

<sup>1</sup> Inou Pol xamel Timoti, xa mabe moletin te polien lu na Iesu Kristo, di madis uvei ak.

Madisi bat mi xamim moletin xil na Hi te hal Pilipae xa mubisti del Iesu Kristo, e mi elda e dikon xil mun namim.

<sup>2</sup> Masis tangan eheien hos e tomat na Hi Tamer e Suv Iesu Kristo iti mi xamim vus. ✧

### *Pol memes Hi ve neketen na Kristin xil te hal Pilipae*

<sup>3</sup> Vehakut di names Hi navan e melele xil vus xa di nanem usil xamim. ✧ <sup>4</sup> Reitin, di nasid mi Hi vehakut e rin namim del sien. <sup>5</sup> Names Hi vengan xa, melele xa mutelong kokot ni longeongen hos mei duxoh xosali, di mupol vituei del nou tangan ti risak ni moletin sav xil likil longeongen hos usil Iesu Kristo. <sup>6</sup> E nake reitin xa Hi, xa tepol kokot ni polien hos ak e meulien namim, itit ni ngan xa ipol ni iha vuma ... ipol sen ni e melele xa Iesu Kristo imei rilomun en. ✧

<sup>7</sup> Momal tangan nilonge ihos ve xamim vengan xa di mupisen eheien namim minou melele xa rapol vituei e polien xa Hi tesa ni minou nggusil eheien hos nan. Vengan xa xamim di mudutou

---

✧ **1:2:** Rom 1:7; Kal 1:3; Flm 1:3 ✧ **1:3:** Rom 1:8; 1Kor 1:4

✧ **1:6:** Plp 2:13; 1Kor 1:8; Plp 1:10; 2:16

ni nou e melele xa nade nim te xeih ak. E di mudutou ni nou mun e melele xa di nasep kila pe met moletin xil xa longeongen hos na Iesu Kristo be reitin. <sup>8</sup> Hi pus kila be reitin xa ieok bei holu tangan nipus rilomun ni xamim, vengan xa eheien navan de xamim mak mu nggoni ngan taxa eheien na Iesu Kristo mun de xamim. ✧

<sup>9</sup> Di nasis Hi tangan isak ni xamim mukil kuhi mu xa itep ma iemim ihei xamim ihe holu mu ixo sexien xa imal. E nasis mun tangan mukil naha xa momal tangan ti mupol ni e melengien xil vus.

<sup>10</sup> Imak, ma e neta xil vus xa mei istal mi xamim, ti mukil kuh sexien hos xil tangan mupol ni, e ti, mupol ni sung. Isak ni, e melele xa Iesu Kristo itilomun en tangan ilepis moletin xil vus, xamim mukila musoh mumese pe meten e holesok ihe tovuol iha xat rin namim. ✧ <sup>11</sup> Imak vengan xa Iesu Kristo ipus kila xa meulien namim nggur huite te momalen xa nggo visali. E moletin sav xil xa lipusi lisa memesien iha mi Hi ven, e ti lipet rat hisen. ✧

*Longeongen hos usil Iesu Kristo mikapis e rute xil vus, neta sav xa Pol de nim te xeih*

<sup>12</sup> Tuxoli e hinoxoli xil, ieok bei tangan mukila xa longpangasien xa bemei minou, Hi di bilesi tangan vatutou ni longeongen hos ak vaha vakapis e rute xil vus mak mu. ✧ <sup>13</sup> Vengan mereketeh xil vus te taon xa mahulong te hal Rom e moletin sav xil vus mun lakila xa nade nim te xeih ak vengan xa di nanggusil xat Iesu Kristo. ✧ <sup>14</sup> Misak ni, tuxoli

---

✧ **1:8:** Rom 1:9; 2Kor 1:23; 1Tes 2:5 ✧ **1:10:** Rom 2:18; 12:2; Hib 5:14; 1Kor 1:8; Plp 1:6; 2:16 ✧ **1:11:** Sion 15:8 ✧ **1:12:** 2Tim 2:9 ✧ **1:13:** Efes 3:1; 4:1; Flm 1:1,9

e hinoxoli xil holu xa ladi inggak, melele xa lapusi xa nade nim te xeih ve neketen navan, neketen nae e Suv Iesu mei nggeih pilei sung. Ma, ulikanen nae be reling xil tangan ha lihithiten sepinien na Hi pe met moletin sav xil.

<sup>15</sup> Be reitin xa rut moletin xil di labit usil Iesu Kristo vengan xa di laketeh misa ni nou e iexil bei tangan lali inou. E rute ngan xil di labit usili vengan xa iexil bei tangan litutou ni moletin sav xil itela. <sup>16</sup> Ngan xil ak di lasep usil Iesu Kristo vengan xa eheien nae di e nou. Xil lakila xa lateling inou nade nim te xeih vengan xa di naketeh xol longeongen hos ak. <sup>17</sup> E moletin sav xil latavithiten longeongen hos usil Iesu Kristo ti vatel nenemien xa momal. Xil di lapol ni nggo nenemien tei xa be nesao vengan xa iexil bei tangan vasak ni longpangasien navan e nim te xeih ak mei vahe eilep pilei sung. <sup>18</sup> E neta sav xa mak, nabesi inou. Nabesi nou vengan xa moletin xil di labit usil Iesu Kristo e rin holu, rute xil del xat nenemien xa momal, e rute sav xil del xat nenemien xa tamal ti. E inou dit namaal tang ven.

<sup>19</sup> Inou namaal vengan xa nakila xa Hi isa huit sisen namim e rin navan e nakila xa Ninin na Iesu Kristo isak ni holesok xil ak mei ihe suse xa ha veok imase ra nim te xeih ixo en. ✧ <sup>20</sup> Ieok bei mak mu e di nanesi xa be reitin xa ninapol ni ti neta xa isak ni nou nihe unoun ven. Ieok bei xa ulikanen navan ihe tovuol melele xa ti nisepin tangan nipet rat Iesu Kristo vehakut ixo tenbeok, neta sav xos nimeul mu nimat ven. ✧

<sup>21</sup> Vengan xosxa nimeul, nipet rat Iesu Kristo

ixo meulien navan. E xosxa nimat, ngan ak ihos mak mu, vengan xa ha nite visali. ✧ <sup>22</sup> Ma xosxa nimeul tang nita itel xat tenbeok, ma nikila nipol e meulien navan tangan nihur huite ve Hi. E natakil kuh ti ngan xave iaxa ieok bei mak mu. ✧ <sup>23</sup> Ngan xalu ak di lulihi inou usil suse lu. Ngan xa bos pilei mak, ieok bei mak mu tangan nistokovein tenbeok e ha nite visal Iesu Kristo. <sup>24</sup> E ve xamim, bos mak mu xa nimeul tang nita itel xat tenbeok tangan nitit ni ngan xa ti nitutou ni xamim. <sup>25</sup> E nakila xa nimeul tang nita vengan xa nake reitin xa ti nitutou ni xamim tangan neketen namim mei imatu mu e mupolu ni sien. <sup>26</sup> Ma, melele xa nihat nipus rilomun ni xamim, mukila musep koai ihe holu ve naha xa Iesu Kristo tepol ni e rin navan.

<sup>27</sup> E neta sav naha xa istal e meulien navan, musak ni meulien namim ihusil xat sexien hos na ngan xil xa di langgusil xat longeongen hos na Iesu Kristo. Imak, ma neta sav xosxa hat nipus xamim mu nisakras, niteong ni xa xamim di musoh vituei nggeih del nenemien tei takes, e di mubae vituei vengan xa di muling neketen namim e longeongen hos. ✧ <sup>28</sup> Ihos xa ulimim nakan ni ti elu namim xil. Vengan melele xa musoh nggeih pe metexil, di pisen ni xa naha xa di obit usili be reitin. E di pisen ni mun xa Hi ihas lelen xil, e iteh meulien e xamim. E be Hi vari xa di misak ni holesok xil ak mei mistal e rin namim. <sup>29</sup> Vengan xa xi pol bos pupu mi xamim melele xa maen xamim muling neketen namim e Iesu Kristo, e maen xamim munggur longpangasien ve hisen.

---

✧ **1:21:** Kal 2:20 ✧ **1:22:** Rom 1:13; 2Kor 5:8 ✧ **1:27:** Efes 4:1; Kol 1:10; 1Tes 2:12; Plp 4:3

<sup>30</sup> E be reitin xa di munggur hisit longpangasien ve neketen namim nggoni ngan taxa mutepusi xa inou natehuri melele xa nateti visal xamim, e xa mulonge di tamu nangguri inggak.✧

## 2

*Rihusil sexien na Iesu Kristo xa nenemien nan be tan*

<sup>1</sup> Vengan xa di mubisti del Iesu Kristo, nakila xa xi di misak ni xamim mei muxeih mu e neketen namim. Vengan xa mukila xa eheien nan di e xamim, ngan ak di pet rat nenemien namim. Vengan xa Ninin Eo de xamim, mupol ni bos mi mosav xil e iemim di misae e xamim mun. <sup>2</sup> Misak ni, nasis xamim tangan mupol ni sexien xil ak xa isak ni nou nipolu ni sien: nenemien namim ihe tei takes, eheien xa de xamim ihe tei takes, tinemim ihe tei takes, e mupol vituei ixoni moletin tei takes.

<sup>3</sup> Ti xamim nasep koai mu naling xi nahe nesao mu nali mosav xil. Ihos mak mu xa xi iling nenemien nan ihe tan, ti ipus mosav xil ixoni ngan xa labos mak mu lali xi tasen. ✧ <sup>4</sup> Ti xamim nanem tasen ni xi ti, e ihos mak mu xa ti inem usil mosav xil. ✧

<sup>5</sup> Nenemien namim mei ixoni nenemien na Iesu Kristo xa tehe tan.

<sup>6</sup> Vengan neta sav xa Kristo be Hi e rin xil vus, ✧  
xi tenapol ni nenemien nan ti vahit vahur xat xeihen nan tangan vapin ni Hi.

<sup>7</sup> E testokovein xeihen nan xa eilep e temei etan, ✧  
mei tehe slev tei tang e rin xil holu.

Xi tepot e ut etan

---

✧ **1:30:** Pol 16:22; Plp 1:13 ✧ **2:3:** Kal 5:26; Rom 12:10 ✧ **2:4:** 1Kor 10:24,33 ✧ **2:6:** Sion 1:1,2; 17:5 ✧ **2:7:** 2Kor 8:9; Sion 1:14; Hib 2:14,17

- e mei be moletin xa tenben da.  
 8 Tepol ni nenemien nan tehe tan  
 e telong xat Hi teha vuma ... temat.  
 Reitin, xi temaen ni tangan vaha vamat e  
 eivave vaxoni moletin tesa tei. ✧  
 9 Ve rin ak, Hi tepet rat his Kristo tehe nesao, ✧  
 e tesa his tei xa eilep mini  
 xa mili his sav xil vus. ✧  
 10 Mak, ma e his Iesu, holesok xil vus mei limot  
 mini: ✧  
 ngan xil xa ladi e ut nesao,  
 ngan xil xa ladi e ut etan,  
 e ngan xil mun xa ladi e ut te maten.  
 11 Reitin, xil vus ti lihithiteni lihit,  
 “Iesu Kristo be Suv te holesok xil vus.”  
 Imak, ma lipus kila mak mu xa Hi Tata be eilep xa  
 be eilep pupu.

*Selxatien xa meulien nar imese tevi pe met mo-  
 letin sav xil*

12 Tuxoli e hinoxoli xil, vengan xa nenemien  
 namim be tan nggoni Iesu, mulong xat inou ixoni  
 ngan xa di mutepol vehakut ni, e melele xa natete  
 visal xamim. E ihos mak mu xa mupol ni taxeak  
 xa natara ti visal xamim. Ti mupol ixeih ten-  
 gan muketeh kuhi xa sexien namim xil lipisen  
 ni xa mube ngan xil xa Hi miteh meulien nae ra  
 tesaen. Mupol ni imak itel merereen e ulikanen, ✧  
 13 vengan xa be Hi iaxa di pol e meulien namim. E  
 be xi iaxa di misak ni xamim di iemim bei tangan  
 muovusil naha xa xi ien bei xamim tangan mupol

---

✧ **2:8:** Sion 10:17; Hib 5:8; 12:2 ✧ **2:9:** Pol 2:33; Hib 1:3 ✧ **2:9:**  
 Efes 1:21; Hib 1:4 ✧ **2:10:** Aes 45:23; Rom 14:11 ✧ **2:12:** Sam  
 2:11; 1Pit 1:17



ni, e di misa xeihen mun mi xamim tangan mukila mupol ni. ✧

<sup>14</sup> E holesok xil vus xa di mupol ni, munaseputut ti e munangor ti natel xamim mun tang. ✧ <sup>15</sup> Imak, ma sexien namim xil ipisen ni xa mube nat Hi xil xa mumese tevi, e neta tovuol vasa vate rin namim e melele xa mudi taxeak e ut etan del motin tesa xil xa sexien nae xil mikavui. Imak, ma meulien namim ileluv e hilaep te xil ixoni ngan xa hitu xil di laleluv e maluxoluken te vongien.

✧ <sup>16</sup> Muhithiten longeongen hos mi xil xa mikila vasa meulien mi xil. Vengan, xosxa imak, ma nikila nisep koai e melele xa Iesu Kristo itilomun en. Nisep koai vengan xa meulien namim ti ipisen ni xa naduxoh hoxalit lohen navan e natapol votei ti. E polien navan nggur huite.

<sup>17</sup> Neta sav xosxa lihas vin inou, nabesi nou tang e di napet rat his Hi ve xamim vus. Vengan xa meulien navan nggoni sanien eo tei xa di nasa ni ba mi Hi ve rin te neketen namim vus. ✧ <sup>18</sup> Nggo hisit sexien ak, melele xa xamim di munggur longpangasien xil, xamim mun mumes Hi e muhesi xamim itel inou. ✧

*Selxatien mi Kristin xil te hal Pilipae tangan lavur pilei Timoti xal Epafrodaetas*

<sup>19</sup> Xosxa ihusil nenemien na Suv Iesu, nanemi nabit nisil Timoti ihat mi xamim navehi ti. Imak, ma melele xa itilomun visal inou, longeongen usil

---

✧ **2:13:** Sion 15:5; 1Kor 12:6; 15:10; 2Kor 3:5; 1Tes 2:13 ✧ **2:14:** 1Kor 10:10; 1Pit 4:9 ✧ **2:15:** Dut 32:5; Mat 10:16; Pol 2:40; Dan 12:3; Mat 5:14; Efes 5:8; 1Tes 2:19; 1Kor 1:8; Plp 1:6,10; Aes 49:4; 65:23; Kal 2:2 ✧ **2:17:** Rom 15:16; 2Tim 4:6 ✧ **2:18:** Plp 3:1; 4:4

xamim xa isa ni minou isa sien minou. <sup>20</sup> Moletin tovuol mun vate visal inou xa vaxoni Timoti xa eheien nan di e xamim e ien bei tangan vatutou ni xamim vaxoni inou. <sup>21</sup> Moletin savsav xil di lapol ni neta xa xil kestang iexil bei tangan lapol ni, e latapol ni ti naha xa Iesu Kristo ien bei. ✧ <sup>22</sup> E Timoti tepisen ni ngamu mi xamim xa xi di pol mi Iesu. Vengan xamel malpol vituei ve longeongen hos na Hi nggoni ngan taxa horamue tei di pol vituei del tamen. <sup>23</sup> Misak ni, e melele xati xa nihe von koten e nilong kil naha xa ti lipol ni minou, nisil Timoti ihat visal xamim. <sup>24</sup> E nanesi xa, navehi ti, Suv imaen inou mun nimeluv nihat vis xamim.

<sup>25</sup> E nanemi nabit bos tangan nisil tuxoli Epafrodaetas itilomun visal xamim. Xamim mutesila temei visal nou tangan vahe eloheoh namim minou e mei vatutou ni nou e rin namim. E xamel mapol vituei e di mabae vituei ve polien na Hi. ✧ <sup>26</sup> Xamim mutelonge xa xi temesei pupu e mutenexo ven. E melele xa Epafrodaetas telong usil nenexoen namim ven, xi milonge misa e bit vatilomun vahat vasao ni xamim. <sup>27</sup> E reitin li xa xi temesei pupu e sangas vamat. E Hi ien tesae en, e ien tesae e nou mun. Vengan xosxa imat, ma inou nilonge isa pilei mak mu. <sup>28</sup> Ma, namaal pupu tangan nisil rilomun ni ihat visal xamim tangan muhesi xamim ven melele xa mupusi. E imak, ma nenexoen navan mun ihe etan. <sup>29</sup> Misak ni, muhur pilei kuhi e his Suv Iesu itel sien. E momal tangan musa merereen mi hisit moletin xil xa lamak. ✧ <sup>30</sup> Vengan xi misa sen meulien nan e

---

✧ **2:21:** 2Tim 4:10   ✧ **2:25:** Plp 4:18   ✧ **2:29:** 1Kor 16:16,18;  
1Tim 5:17

sangas vamat ve polien na Kristo. Xi, ulin takan ni melele te xeih xil e di pol sen polien xil xa xamim iemim bei tangan mupol ni.

### 3

*Momalen xa be reitin pe met Hi nggo suse te neketen*

<sup>1</sup> Misak ni, tuxoli e hinoxoli xil, neta sav xa naha imei, muhesi xamim vengan xa di mubisti del Suv. Taxeih ti minou tangan nasel xat rilomun ni xamim usil holesok xil ak, vengan nakila xa di misikoe xol kuh meulien namim. ✧

<sup>2</sup> Muketeh kuhi ve titsa te luvosen xil xa lasa langgoni kuli reran xil. Moletin xil ak latamese ti pe met Hi. Xil di labiteni xa moletin itihi purun rut tenben ixo sexien te vexahu tangan mei ihe moletin xati na Hi. ✧ <sup>3</sup> E xir rataling nenesien nar ti e sexien xil xa di lapol ni e tenbe moletin tang nggot hale tangan vapol ni moletin tei mei vahe moletin xati na Hi. E-e, xir ranggur vexahu xa be reitin nggo tinexir, vengan xa di ramot mi Hi nggo Ninin Eo nan e rabesi xir vengan xa di rabisti del xat Iesu Kristo. ✧

<sup>4</sup> Xosxa ieok bei, inou mun nikila niling nenesien navan e holesok xil xa mak xa moletin xil di lapol ni del tenbexil. Reitin, xosxa moletin tei di minemi bit xi mikila valing nenesien nan e neta xil xa xi di pol ni del tenben tangan vasak ni mei vama pe met Hi, inou natepol ni mak mu teli. ✧ <sup>5</sup> Vengan inou natehe vexahu melele xa

---

✧ **3:1:** Plp 2:18; 4:4 ✧ **3:2:** Sam 22:16,20; Rev 22:15 ✧ **3:3:** Rom 2:29 ✧ **3:4:** 2Kor 11:18

melengien navan tehe tol e he sav (8).<sup>\*</sup> Melele xa latepes inou, natehe ngan Isrel tei ngamu e nanggo vatimol xa mahulong na Bensamin. Reitin xa nabe Hibrui xati. E rin te rae xil na Siu xil, inou nabe Farasi tei xa natehusil xati texeih. ✧ <sup>6</sup> E vengan xa ieok tehei pupu tangan nasak ni mosav xil mun ti lavusil rae xil ak, natesa pangasien xil holu mi ngan xil te Sias na Iesu Kristo. Natepol ni temak vengan xa natenemi natehit di lasak pisi tangan lasak ni rae xil na Hi vakesae. ✧ Ma xosxa inou nakila mei namal pe met Hi vaxo rin xa di nanggusil xat kuh rae nan xil ak, ma moletin tovuol mikila vakamet neta tova xa vasa vaha xat rin navan. ✧

<sup>7</sup> E neta sav xa holesok xil vus xa natepol ni tetiamu tangan navusil kuh rae xil na Hi latehe holu pupu, melele xa mei nabisti del Iesu Kristo, napas kila xa holesok xil ak be neta sav tang. ✧ <sup>8</sup> E tave holesok xil ak ti kestang. Inou nanemi xa holesok xil vus e meulien navan tehe neta sav tang. Vengan melele xa mei natekil Iesu Kristo, natepus kila xa xi be eilep mak mu mili holesok sav xil vus. Misak ni, tangan nihusil xati, di naso rerat holesok sav xil vus e meulien navan ba nggoni tisok tang tangan nikila nihusil kes ni Iesu Kristo ixeh mak mu. <sup>9</sup> Reitin, ieok bei mak mu tangan Hi ipus kila xa di nabisti del Iesu, e natamei ti namal pe meten vaxo longxatien navan

---

<sup>\*</sup> **3:5:** Sen 17:1-27 di biteni xa Hi tesemae ni Ebrahim e horamue xil vus te vatimol nan tangan lihe vexahu melele xa melengien nae xil ihe tol e he sav (8) tangan vapisen hitxatien te xeih nan dela.  
 ✧ **3:5:** Luk 1:59; 2:21; 2Kor 11:22; Pol 23:6; 26:5 ✧ **3:6:** Pol 9:1-2  
 ✧ **3:6:** Pol 8:3; 22:4; 26:9-11 ✧ **3:7:** Mat 13:44,46; Luk 14:33

e rae nan xil. E-e, taxeak namal pe meten vengan xa neketen navan de Iesu Kristo. Reitin, Hi di misa momalen mi ngan xil kestang xa di laling neketen nae e Iesu Kristo. ✧ <sup>10</sup> Inou ieok bei pupu tangan nakil ti mu Iesu Kristo e nakil kuh xeihen na Hi e meulien navan. Ngan ak be xeihen xa Hi tepisen ni e melele xa tesak ni Iesu Kristo temea rilomun ra maten. E ieok bei mun xa namur rut longpangasien vaxoni ngan xa xi tehuri, neta sav xosxa nimat ixoni. ✧ <sup>11</sup> Vengan xosxa imak, ma nikila nihur naha xa nateling nenesien navan en, xa inou mun nimea rilomun ra maten. ✧

*Selxatien tangan ti riloh ixeih e rihur huit neketen nar*

<sup>12</sup> E natavitenti ti xa namal tuei mu natehur sen huit neketen navan ngamu. E-e. Di nasak pisi tangan niloh ixeih mak mu tangan huite ak mei ihe navan, vengan Iesu Kristo tepol texeih tangan vahur nou name nan. ✧ <sup>13</sup> Tuxoli e hinoxoli xil, nakila xa natahur sen huit neketen navan ti mu. E di napol ni neta tei, ieok di bovorong ni naha xa di pe touk, e di naloh nggeih tangan namur naha xa di diamu ni nou. <sup>14</sup> Reitin, di naloh nggeih tangan nituxoh hoxalit lohen te neketen navan e nihur huite teni. Huit neketen ak be tangan nihe ut nesao reitin vengan xa Hi tekes inou mei nabisti del Iesu Kristo. ✧

<sup>15</sup> Xir vus xa ramatu ngamu e neketen nar, ti rihur hisit nenemien xa natesep usili nesao. E xosxa rute e xamim langgur nenemien sav, ma

---

✧ **3:9:** Rom 3:21-22 ✧ **3:10:** Rom 6:3-5; 8:17; Kal 6:17 ✧ **3:11:** Pol 4:2; Rev 20:5-6 ✧ **3:12:** 1Tim 6:12,19; Pol 9:5-6 ✧ **3:14:** 1Kor 9:24

Hi ipol ni xil mei lipus kil kuh reitinen teni. ✧  
 16 E ngan xa be eilep mak mu iaxa ti rihusil xat reitinen xa Hi tepisen ni ngamu mi xir. ✧

17 Tuxoli e hinoxoli xil, xamim vus ti muhusil xat sexien e nenemien navan xil. E muhusil xat ngan xil mun xa mupusi xa sexien nae nggoni sexien namem. ✧ 18 Vengan xa, nggoni ngan xa natehiteni mi xamim melele holu ngamu, e di nabiteni mun del simetok, sexien na moletin xil holu di pisen ni xa labe elu mi longongen hos usil maten na Iesu Kristo e eivave. ✧ 19 E Hi ihu lelen xil vengan xa di langgusil xat kes ni naha xa tenbexil di iexil bei nggoni ngan xa be hi nae, e holesok xil xa momal tangan lihe unoun ven, xil di lasep koai ven sung. Reitin, xil di lanem usil holesok xil te ut etan tang. ✧ 20 E xir, rabe hortan xil te ut nesao. E di radatil moletin te teh meulien en nar xa ixo ut nesao imei, ngan ak be Suv Iesu Kristo. ✧ 21 E melele nen ak, Iesu ihiles tenbexir te ut etan xa memel tang, e ipol ni xil mei lixoni tenben hos te ut nesao xa minehinen te xeihen nan da en. E ipol ni imak itel hisit xeihen nan xa di pol ni holesok xil vus mei ladi pe hen. ✧

## 4

*Selxatien xil tangan riti vituei ihos e ti riling nenemien nar iti e holesok xil na Hi*

1 Tuxoli e hinoxoli xil, vengan xa rabe hortan xil te ut nesao, musoh ixeih e neketen namim e

---

✧ **3:15:** Mat 5:48; 1Kor 2:6 ✧ **3:16:** Kal 6:16 ✧ **3:17:** 1Kor 4:16; 11:1; 1Tes 1:7; 1Pit 5:3 ✧ **3:18:** 1Kor 1:23; Kal 6:12 ✧ **3:19:** Rom 16:18; 8:5-6 ✧ **3:20:** Efes 2:6,19; Hib 12:22 ✧ **3:21:** Rom 8:29; 1Kor 15:43-53; 15:28

Suv Iesu. Eheien navan xa mahulong di e xamim, e ieok bei pupu tangan nipus xamim vatei mun. Vengan xamim di musak ni nou nabesi nou e neketen namim nggoni huit lohen te meulien navan. ✧

<sup>2</sup> Iuodia e Sintike, di nadakes xamil tangan mulsak pisi mulimei e nenemien tei takes vengan xa xamil vus di munggulil xat Suv tei takes. <sup>3</sup> E nasisuk, Susunggul, xa obe tua hos navan xa rupol vituei, tangan ha ututou ni atou xalu ak. Vengan xalu lutekon ni polien tetel xat inou tangan mattehithiten longongen hos. Reitin, matepol vituei tetel Klemen e tua sav xil mun xa hisexil di e Vanuvei te Meulien na Hi xa di ladis his moletin xil xa lihur meulien sal e ut nesao di en. ✧

<sup>4</sup> Vehakut, sien iti mi xamim vengan xa di mubisti del Suv. Reitin, nabiteni mun xa muhesi xamim. ✧ <sup>5</sup> Ti muhe hanmerou mi moletin xil vus vengan xa, navehi ti, Suv itilomun imei. ✧

<sup>6</sup> Munanexo ti ve neta tova, e ti musis mi Hi ve holesok xil vus. E melele xa musis ve tutouen, mupol ni itel memesien. ✧ <sup>7</sup> Imak, ma tomat na Hi xa mili kilakilen na moletin xil te ut etan iti mi xamim. Reitin, vengan xa mubisti del xat Iesu Kristo, tomat ak isikoe xol kuh meulien e nenemien namim. ✧

<sup>8</sup> Tuxoli e hinoxoli xil, neta teimun xa nabit namiteni mi xamim be tangan xa ti muling nenemien namim iti e holesok xil xa ihos: ngan xa be reitin, ngan xa momal, ngan xa memase, ngan xa

---

✧ **4:1:** 1Tes 2:19-20 ✧ **4:3:** Eks 32:32,33; Sam 69:28; Dan 12:1; Rev 3:5; 13:18; 17:8; 20:12,15; 21:27 ✧ **4:4:** Plp 3:1 ✧ **4:5:** Hib 10:37; Tem 5:8,9 ✧ **4:6:** Mat 6:25; 1Pit 5:7; Kol 4:2 ✧ **4:7:** Aes 26:3; Sion 14:27; Kol 3:15

pipin tangan mumerere ni, ngan xa tellep, ngan xa di misak ni Hi besi xi ven, e ngan xa momal tangan risep koai ven. Reitin, holesok xil xa mak iaxa xamim ti munem usili. ✧ <sup>9</sup> Muxulehi mupol ni sexien xil xa natepispisi ni mi xamim e natesa ni mi xamim. Reitin, holesok xil xa mutelong nou natesep usili mu mutepus nou natepol ni, xamim sung ti mupol ni. E Hi, xa be vatit tomat, iti visal xamim. ✧

*Pol memes Kristin xil te hal Pilipae ve sanien nae mini*

<sup>10</sup> Inou napolu ni sien e names Suv melele xa napus tutouen xa musa ni minou. Reitin xa teti-amu mutetutou ni nou, e be nousav vuteili xa mutnasa ti mun neta. Nakila xa iemim tabong ni nou ti, e mesal tovuol tangan mupisen eheien namim minou. <sup>11</sup> E nataviteni ti vamak vengan xa nabe tamure ni neta ngan. Vengan xa mei nakil sexien te sien sung, tave ti neta naha xa de heok. ✧ <sup>12</sup> Vengan nakila nameul vatel ngan xa hokorong, mu vatel ngan xa be holu. E mei nakil kuh sexien te sien, neta sav xosxa anien avan holu, mu mae nggat inou; neta sav xosxa holesok navan be holu mu tovuol. <sup>13</sup> Nakila namisu ni holesok xil vus vatel xeihen xa Iesu Kristo di misa ni minou. ✧ <sup>14</sup> E tave ti neta xa mak, ma names xamim ve tutouen xa di musa ni minou e melele xa di nabisu ni longpangasien navan xil.

<sup>15</sup> Xamim mol-Pilipae xil mukil kuhi xa, melele xa natehe reling provins te hal Masedonia e ba natehithiten rohon ni longongen hos na Hi e rute

---

✧ **4:8:** Rom 12:17 ✧ **4:9:** Rom 15:33; 16:20; 1Kor 14:33; 1Tes 5:23 ✧ **4:11:** 1Tim 6:6 ✧ **4:13:** 2Kor 12:10; 2Tim 4:17



sav xil, xamim kestang mutesa tutouen minou. Reitin, sias sav xil latnasa ti neta tengan vatutou ni nou, tehe xamim kestang. ☆ 16 E melele xa natehe taon te hal Tesalonaeka, tenave melele tei takes ti xa mutesa neta ngan tengan vatutou ni nou. 17 Natavitenti ti vamak vengan xa ieok bei tengan musa tutouen vatei mun minou. E-e. E ieok bei tengan Hi ipus kil holesok xil xa di mupol ni e rin navan, e isa huite teni mi xamim e melengien tei xa ti imei. ☆

18 Ieok bei tengan namit kila mi xamim xa natehur sen tutouen xa mutesa ni minou nggo he Epafrodaetas. E napusi xa be mahulong mak mu mili ngan xa di ieok bei. Sanien namim nggoni sanien eo xa momal tevi pe met Hi, e vokon teni bos pupu e di misa sien mini. ☆ 19 E nakila xa Hi navan polu ni holesok xil vus. E xi isa holesok xil vus mi xamim xa mube tamure ni vengan xa di mubisti del Iesu Kristo. 20 Ripet rat his Hi Tamer xa minehinen te xeihen nan iti ha vuma ... navus ti vatova. Reitin.

### *Sepinien kor*

21 Nabit 'bos makoe' mi moletin xil na Hi xa ladi visal xamim e di labisti del Iesu Kristo. E tuxoli xil e neketen xa ladi visal nou di labit 'bos makoe' nae bat mi xamim. 22 Reitin, moletin xil vus na Hi e rute ak di labit 'bos makoe' nae mi xamim, e ngan xil mun xa ladi e tim sa suv toto te hal Rom. ☆

23 Nasis tengan eheien hos na Suv Iesu Kristo iti mi xamim vus.

---

☆ 4:15: 2Kor 11:9    ☆ 4:17: 1Kor 9:11    ☆ 4:18: Sen 8:21; Eks 29:18; Esek 20:41    ☆ 4:22: Plp 1:13

**Vanuvei Eo e sepinien Vatlongos na  
mol-Vatimol xil niutestamen e rute te  
oltestamen**  
**Portions of the Holy Bible in the Southeast Ambrym  
Language of Vanuatu**  
**Des portions de la Sainte Bible dans le Sud-Est  
Ambrym Langue de Vanuatu**

copyright © 2015 Wycliffe Bible Translators, Inc.

Language: Southeast Ambrym (Ambrym, Southeast)

Dialect: Central

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-06

---

PDF generated using Haiola and XeLaTeX on 11 Nov 2022 from source files dated 9 Oct 2020

d6322831-f65b-57c1-8673-8099ea7771d7